

အဿမိကမိက

AWIG-AWIG

ဒေသအဿမိကမိက

DESA ADAT KEKERAN



ဒေသအဿမိကမိက

DESA KEKERAN, KECAMATAN MENGWI,

နယ်ဒေသအဿမိကမိက

KABUPATEN BADUNG

မေလှည့်ကျတော်

TAHUN 2016

MURDDHA WAKYA

OM AWIGNAM ASTU, DESA TATA CARA, OM NAMA CIWAYA

OM CRI PASUPATASTRA, OM AWIGNAM ASTU NAMA SWAHA.

Makadi punika pangastawan tityang majeng ring Ida Sang Hyang Parama Wisesa dumogi sidha ngamanggihin karahayuan tan kataman lara wighna maka buatan tityang sareng sami pinaka krama Desa Adat Kekeran. Putusing panugrahan krama Desa Adat Kekeran, makarya nyurat awig-awig Desa Adat, Desa tata cara, mawastu prasida kasidian tatujon tityang makasami rawuhing kapungkur wekas tur maka sami pada sumuyub miwah ngamanggehang makadi linging awig-awig.

Sembah bhakti miwah pangastawan krama majeng ring paduka Bhatàra - Bhatari sasuhunan sami, riantukan wantah malarapan panghyangning kalih paswécan Ida Sang Hyang Widhi Wasa asung kretawarànugraha nresti jagat jangkep rawuhing sadaging nyane sami, mawinan wénten kahuripan sekala niskala ring Bhuwana Agung miwah ring Bhuwana Alit.

Manut dresta, Désané kamanggehang dados pasayuban Krama Désa rawuhing kulawarga pawongan nyane sami, mawastu raris Désané kamanggehang pinaka pawakan Bhuwana Agung, pawongan nyane kamanggehang pinaka pawakan Bhuwana Alit.

Sotaning pawakan Bhuwana Agung, Désané taler kamanggehang pinaka pawakan bhàwa mahurip, sané kacirénin antuk wéntené pakilit Tri Hita Kàrana sané tan dados pasahang, luwiré :

ha. Parhyangan, inggih punika : sahanan genah suci maka panyiwian Désa, genah ngarcana prabhàwan Ida Sang Hyang Parama Wisésa, pinaka jiwa pramanan Désané;

na. Pawongan, inggih punika : Krama rawuhing warga Désa maka sami sane pinaka pawakan Tri Kaya pinaka bàyu pramànan Désané, mawinan Désané prasida molah maprawretti;

ca. Palemahan, inggih punika : sahananing pakarangan, tegal, carik, miwah sétra sakakuwuban Désa Adat, pinaka sthùla sariran Désané.

Awig - awig puniki ngawit puput kapirarem nemoning rahina Redite Wage wuku Kuningan Tang 10 sasih Katiga, Isaka 1938, tanggal 11 bulan September warsa 2016 ring Kantor LPD Desa Adat Kekeran, lan kaparipurnayang nemoning rahina Redite Keliwon wuku Pujut tanggal 02 bulan Oktober warsa 2016.

NIASA DESA ADAT KEKERAN

KEKER MAS



KASUKSMAN NIASA DESA ADAT KEKERAN

1. KEKER : Tegep ring manah

2. MAS : Nguttamayang kadharman
KEKER MAS : Kategepan jalaran anggen ngaptiang
karahayuan lan kadharman
3. SAYAP : Pancasila
4. IKUH : Panca Sraddha
5. GELANG-3 : Patunggilan manah
6. PADI lan KAPAS : Kawibhuan lan karahayuan

BANTANG AWIG – AWIG DESA ADAT

... i ၇၇	MURDDHAWAKYA	i
... ii ၇၇	KASUKSMAN NIASA DESA ADAT	ii
iv ၇၇	BANTANG AWIG – AWIG DESA ADAT	iv
...၇၇	SARGAH PERTAMA ARAN LAN WAWIDANGAN DESA	1
...၃၇	SARGAH KALIH PAMIKUKUH LAN PATITIS	4
...၇၇	SARGAH TIGA SUKERTHA TATA AGAMA/PARHYANGAN	5
...၇၇	Palet 1 Indik Dewa Yajnya	5
၇၇	Palet 2 Indik Pitra Yajnya	15
၇၇	Palet 3 Indik Butha Yajnya	23
၇၇	Palet 4 Indik Manusa Yajnya	26
၇၇	Palet 5 Indik Resi Yajnya	28
၇၇	SARGAH EMPAT SUKERTHA TATA PAWONGAN	30
၇၇	Palet 1 Indik Krama	30
၇၇	Palet 2 Pamucuk Desa	42
၇၇	Palet 3 Indik Kulkul.....	50
၇၇	Palet 4 Indik Paruman	52
၇၇	Palet 5 Indik Padruwen Desa	55

Palet 6	Indik Penyanggran Banjar	58
Palet 7	Indik Pawiwahan	59
Palet 8	Indik Santana	64
Palet 9	Indik Nyapian	67
Palet 10	Indik Warisan	70
SARGAH LIMA SUKERTA TATA PALEMAHAN		73
Palet 1	Karang, Tegal lan Carik	73
Palet 2	Setra	75
Palet 3	Papayonan	77
Palet 4	Wawalungan	78
Palet 5	Wawangunan	79
SARGAH ENEM WICARA, BHAYA,DUSTA LAN PAMIDANDA.....		80
Palet 1	Indik Wicara	80
Palet 2	Indik Bhaya lan Dusta	82
Palet 3	Indik Pamidanda	83
SARGAH PITU NGUWAH-NGUWUHIN AWIG – AWIG		86
SARGAH KUTUS SAMAPTA		87

SARGAH PERTAMA

ARAN LAN WEWIDANGAN DESA

Pawos 1.

- (1) Desa Adat puniki mawasta Desa Adat Kekeran, sane magenah ring Kecamatan Mengwi, Kabupaten Badung;
- (2) Jebar kakuwub wawidangan nyane mawates nyatur :
 - ha. Sisih wetan/kangin ring Carik Uma Bantas-Desa Adat Mengwitani, Tukad Yeh Penet-Desa Adat Kapal lan Desa Adat Tangeb;
 - na. Sisih kulon/kawuh ring Yeh Ulaman-Desa Adat Kaba-kaba;
 - ca. Sisih lor/kaler ring Desa Adat Mengwitani;
 - ra. Sisih kidul/kelod ring Tukad Yeh Penet-Desa Adat Tangeb lan Desa Adat Selingsing;
- (3) Desa puniki kawangun antuk karang desa utawi gebogan krama, turmaning kepah dados asta babanjaran, utawi sinanggeh banjar adat, luire;
 - ha. Banjar Adat Gelagah Puwun
 - 1) Tempekan 1
 - 2) Tempekan 2

3) Tempekan 3

4) Tempekan 4 .

na. Banjar Adat Delod Sema

1) Tempekan Kaja Kangin

2) Tempekan Kelod Kangin

3) Tempekan Kelod Kauh

4) Tempekan Kaja Kauh

ca. Banjar Adat Dangin Pangkung

1) Tempekan 1

2) Tempekan 2

3) Tempekan 3

4) Tempekan 4

5) Tempekan 5

6) Tempekan 6

ra. Banjar Adat Sangiang

1) Tempekan 1

2) Tempekan 2

3) Tempekan 3

4) Tempekan 4

ka. Banjar Adat Penyarikan

1) Tempekan 1

2) Tempekan 2

3) Tempekan 3

da. Banjar Adat Jeroan

ta. Banjar Adat Delod Yeh

1) Tempekan 1

2) Tempekan 2

3) Tempekan 3

4) Tempekan 4

sa. Banjar Adat Tauman

1) Tempekan 1

2) Tempekan 2

3) Tempekan 3

SARGAH KALIH

PAMIKUKUH LAN PATITIS

Pawos 2

(1) Desa Adat Kekeran ngamanggehang pamikukuh makadi ring sor :

ha. Pancasila;

na. Undang-Undang Dasar 1945;

ca. Tri Hita Karana;

ra. Hak Azasi Manusia utawi HAM;

ka. Uger – uger saking Guru Wisesa indik Desa Adat;

Pawos 3

(1) Luwir Patitis Desa Adat Kekeran

ha. Mikukuhin miwah ngarajegang Sang Hyang Agama Hindu;

na. Ngutamayang/Nginggilang tata prawertine magama;

ca. Ngajegang kasukertan desa saha pawongannia sekala lan niskala;

ra. Ngajegang kasukertan druwen desa;

SARGAH TIGA

SUKERTHA TATA AGAMA/PARHYANGAN

Palet 1

Indik Dewa Yadnya

Pawos 4

(1) Palinggih panyiwian desa ring wawidangan Desa Adat/ Pakraman Kekeran luire:

ha. Kahyangan Desa Pengempon Kaler :

1) Kahyangan Tiga (Pura Puseh, Desa / Bale Agung lan Pura Dalem);

2) Pelinggih Sri Sedana;

3) Pura Prajapati;

4) Pura Penataran;

5) Pura Pasucian;

6) Pelinggih Pemasaran Agung;

7) Pura Melanting (Penyosohan);

na. Kahyangan Desa Pengempon Kelod :

1) Kahyangan Tiga (Pura Desa, Bale Agung, Pura Puseh lan Pura Dalem);

2) Pura Prajapati;

3) Pura Pasucian;

4) Pelinggih Sri Sedana;

5) Pura Penataran;

6) Pelinggih Marga Tiga

7) Pelinggih Penganyutan

ca. Pura-pura papeletan, sane sampun kasurat ring Ekalikita Desa Adat Kekeran;

ra. Pura-pura pedadian/kawitan miwah paibon, sane sampun kasurat ring Ekalikita
Desa Adat Kekeran;

(2) Rahina piotalan soang-soang kahyangan inucap, kadi ring sor :

ha. Pura Kahyangan Desa Pengempon Kaler, luire :

1) Pura Puseh, Desa lan Bale Agung ri kala Buda Keliwon Pahang;

- 2) Pura Dalem, ri kala Tilem sedereng Tumpek Uye;
 - 3) Pura Prajapati, ri kala Tilem sasih Kedasa;
 - 4) Pura Penataran, ri kala Purnama risampun piodalan ring Pura Dalem;
 - 5) Pura Pasucian, ri kala Buda Umanis wuku Dukut;
 - 6) Pelinggih Sri Sedana ri kala Buda Wage wuku Klawu;
 - 7) Pelinggih Pemasaran Agung ri kala Tilem sasih Kesanga;
 - 8) Pura Melanting (Penyosohan) ri kala Saniscara Keliwon wuku Landep;
- na. Pura Kahyangan Desa Pengempon Kelod, luire :

- 1) Pura Desa lan Bale Agung, ri kala Anggara Keliwon wuku Prangbakat;
- 2) Pura Puseh, ri kala Buda Wage wuku Klawu;
- 3) Pura Dalem, Pura Prajapati lan Pura Pasucian, ri kala Tilem risampun wusan
Buda Keliwon Pahang;
- 4) Pelinggih Sri Sedana, ri kala Sukra Umanis wuku Klawu;
- 5) Pura Penataran, ri kala Purnama risampun piodalan ring Pura Dalem;
- 6) Pelinggih Marga Tiga ri kala Anggara Keliwon wuku Perangbakat;
- 7) Pelinggih Penganyutan ri kala Tilem wusan Buda Keliwon Pahang;

ca. Rahina piodalan ring pura-pura papeletan, sane sampun kasurat ring Ekalikita
Desa Adat Kekeran;

ra. Rahina piodalan ring pura padadian/kawitan miwah paibon, sane sampun kasurat
ring Ekalikita Desa Adat Kekeran;

(3) Pangaci ring pura inucap manut kecap sastra agama, saha kalaksanayang nista, madya,
utama manut kawentenan lan pararem, luwire :

ha. Prade wenten maturan leleb, wastra piranti dulang, kuning utawi petak;

na. Tegeh aturan sawatara 50 cm utawi nganggen keben mangda dangan antuk
madeengan;

ca. Pamuspan purnama/tilem kaetang antuk prajuru kaenterang olih pemangku;

(4) Pangempon soang-soang pura manut dresta kadi ring sor :

ha. Kahyangan Desa Pengempon Kaler, luwire : Banjar Adat Gelagah Puwun, Delod
Sema, Dangin Pangkung lan aparo saking Banjar Adat Sangiang;

na. Kahyangan Desa Pengempon Kelod, luwire : Aparo saking Banjar Adat Sangiang,
Penyarikan, Jeroan, Delod Yeh lan Banjar Adat Tauman;

ca. Pura-pura papeletan sane kaempon soang-soang pemaksan;

ra. Pura padadian/kawitan miwah paibon sane kaempon soang-soang pemaksan;

Pawos 5

(1) Ring soang-soang pura inucap kawentenang pemangku;

(2) Ngadegang pemangku manut dudonan :

ha. Nyanjan utawi masemurang, soang-soang mapiteges mapinunas ring ajeng

panataran Ida Bhetara manawi ring balian, lan sapanunggilan ipun;

na. Turunan utawi ngawaris;

ca. Kacatri, kapilih, katunjuk olih krama desa;

(3) Tan kawenang kanggen pamangku luire :

ha. Cedaangga saking wawu medal makadi peceng, perot, cungh, sengkok lan

sapanunggilan ipun;

na. Kageringan makadi sakit ila, ayan, buduh, wiadin edan;

ca. Sane madruwe kasucian urip tan becik (cedalaksana);

ra. Sang sapasira ugi sane tan kapatutang manut pararem;

(4) Prabea kapamangkuan :

ha. Madiksa Widhi (ngawintenin) kamedalin saha kalaksanayang antuk sang

ngadegang makadi krama desa utawi pangempon pura soang-soang;

na. Pitra yadnya ri wekas patut kasungkemin antuk krama desa utawi pangemong
sanistania Brahma Prayascita manut pararem;

(5). Pamangku patut ngamanggehang sasananing pamangku, luire tan wenang :

ha. Ajejuden;

na. Mapunyah-punyah;

ca. Nyolong semara;

ra. Ngerabinin wong rabi;

Pawos 6

(1) Swadarmaning pamangku luire :

ha. Ngenterang upacara piodalan ring kahyangan utawi ring soang-soang pakubon
krama;

na. Tan wenang salab-sulub, yan mamurug wenang pamangku inucap nyepuhin raga;

ca. Prade silih sinunggil pamangku kapialang utawi cuntaka, kengin nyelang
pamangku siosan utawi nuwur sang sulinggih;

ra. Samalih yan sampun pamangku ngayah tigang rahina ring pura, kancit wenten
kulawarganya padem/lina, pamangku inucap tan keneng cuntaka, sakewanten
pamangku tan budal selami piodalan;

ka. Yening wenten kulawarga pamangku seda/padem ritatkala petirtan ring pura sane kaamong olih pamangku, petirtan punika ke kapiserah ring krama desa utawi pemaksan;

da. Wenang ngicenin kegalangan ring warga banjar utawi desa;

(2) Petias utawi olih-olihan pamangku luire :

ha. Panyolasan ritatkala pemelastian, sane wantah katur ring pamangku lan juru pundut ring Pura Puseh Desa Kaler;

na. Sarin canang ritatkala petirtan sane kaepah nganutin pararem ring joga soang-soang;

ca. Upon palabha carik utawi tegal manut pararem ring joga soang-soang;

ra. Pidaging/jinah luput manuk, ritatkala piodalan;

ka. Reramon luput manuk ritatkala piodalan;

da. Yening wenten ngewangun/ngamecikan parhyangan ngemedalang jinah, patut :

- pamangku sane ngamong luput manuk;

- pamangku Kahyangan Desa sane tan ngamong keni separo;

- prajuru desa adat patut polih luputan separo;

- ta. Yening wenten ngewangun/ngamecikan parhyangan ngganggen jinah sang angawa rat, pamangku sane ngamong, pamangku kahyangan desa sane tan ngamong lan prajuru desa adat tan polih pah-pahan jinah;

Pawos 7

- (1) Pamangku kagentosin riantukan :

ha. Seda utawi lina;

na. Pinunas ngraga manawi kageringan lan sapanunggilan ipun;

ca. Kawusang antuk krama sangkaning malaksana sane tan patut (asta dusta);

- (2) Prade pamangku malaksana asta dusta, patut :

ha. Sira mangku nyuciang raga sepatut nyane (prebya ngeraga);

na. Gumanti malih melaksana, sira mangku kewusang;

ca. Keni pamidanda manut pararem;

Pawos 8

Kasukertan kahyangan ring desa :

- (1) Sane nenten kalugra ngaranjing kapura luwire :

ha. Sang katiban cuntaka, makadi sebel raga :

- 1) Sebel kandel, ngraja sewala, selami dereng mabersih;
- 2) Sebel sangkaning madruwe putra, sajeroning 42 rahina ;
- 3) Sebel pangantenan, sadurung mabiakala;
- 4) Sebel sangkaning kalayu sekaran utawi wenten kapademan manut sengker
nyantos nyepuh;

na. Makta sahananing sane kasinanggeh ngaletchin manut agama : tulang utawi rah
jadma miwah jadma saking wiwitang watang layudan pitra yadnya;

ca. Wawalungan suku pat, sajawaning ri kala mapepada upami sampi, celeng, kebo,
kuda lan kambing;

ra. Mabusana sane tan manut kadi tata caraning ngaranjing kapura;

ka. Anak alit sadurung mayusa tigang sasih;

da. Sadurung polih wak-wakan (pituduh) prajuru Desa Adat/ Pakraman;

ta. Jadma buduh, sakit ila, mobot sane tan wenten ngangkenin, memitra ngalang,
jadma panten, pianak bebinjat sane dereng meupakara manut agama;

(2) Busana ngranjing kapura wenang nganutin dresta minakadi :

ha. Ritatkala ngaturang ayah, mawastra lan nyalempot;

na. Ritatkala ngaturang sembah, mabusana jangkep;

ca. Siosan kadi ring ajeng nenten kalugra, sajawaning sampun pituduh prajuru;

(3) Parilaksana tan kawenangan ring pura, luire :

ha. Masuara sane kasinanggeh wak purusya, wak capala;

na. Mecikang wastra, mesesenengan, mekolem dados asiki lanang wadon, mebacin,
ngelagar perana, mecikang pusungan, mekutu miwah meprewerti siwosan sane tan
manut ring Agama;

ca. Masumpah utawi macoran sajawaning pituduh prajuru desa;

ra. Ngias raga sajawaning sulinggih miwah pandita;

ka. Mungguh tedun ring palinggih sajawaning pituduh pamangku utawi prajuru desa;

da. Memisuh, miyegan bilih-bilih jantos metu rah, mejejuden;

(4) Sang mamurug kadi kecape ring ajeng, keni pamidanda **manut pararem**;

Pawos 9

(1) Yan wenten jadma karawuhan ring pura, kengin kapintonin antuk asepi utawi toya prade
rumasa kasumangsayan, yan tan wiakti, jadma inucap kasisipan patut kadanda **manut**
pararem;

- (2) Prade kahyangan kahanan dhurmanggala, minakadi kapanca bhaya, pamangku patut digelis nyadokang ring prajuru mangda marumang krama desa tur ngawentenang upacara sapatutnya;

Palet 2

Indik Pitra Yadnya

Pawos 10

Dudonan pamargin Pitra Yadnya.

- (1) Pangupakaran sang padem utawi seda :

ha. Antuk mendem utawi ngeseng, makacihna pakingsan ring Ibu Pertiwi utawi pakingsan ring Gni, salami nutupang prabea;

na. Atiwa-tiwa (upacara pangabenan/palebong);

- (2) Upakara-upacara Pitra Yadnya ri wusan kaabenang mawastu munggah daun bingin (ngroras) ri sampune punika wawu kamargiang ngalinggihang Dewa Hyang (Bhatara - Bhatari);

Pawos 11

Swadharma lan tategenan krama prade wenten sinalih tunggil warga padem utawi seda :

- (1) Sang kaduhkitan patut :

ha. Nyadokang ring prajuru adat tur nunas tatimbang ring kawentenan pamargin
nyane;

na. Ngaturin krama Banjar mangda ngarombo makarya eteh-ete sawa kadulurin
panyembrama canang sakasidan antuk;

(2) Swadarmaning Banjar/Desa :

ha. Kelian banjar maritatas pamargin sang kaduhkitan, napi pacang kapendem,
makingsan rihin utawi lantur kaabenang;

na. Prade kapendem, raris kawentenang kulkul patahu olih kelian banjar utawi patajuh
nyane;

ca. Panyanggran Banjar salanturnya :

1) Soang-soang krama banjar nedunin patas manut dresta;

2) Ngarombo ngaryanin eteh-ete sawa saha kasarengin antuk krama, miwah
sang sane rauh;

3) Sami krama banjar nganter kasetra jantos pamendemane puput;

4) Pemargin pegebagan nganutin pararem soang-soang banjar;

5) Sane sinanggeh cuntaka (sebel) ngawit saking ngendag utawi ngulapin ring
setra jantos ngeseng sawa utawi jantos maprayascita;

(3) Tata cara ngangge setra, luwire :

ha. Prade ngaben matempung (melabuh) katio desa patut mesadok ring prajuru desa miwah mangku kahyangan dalem/meraja pati;

na. Tan dados nginepang bangbang miwah tan kawenang mendem rikala : semut sadulur, kala gotongan, pasah, prawani, purnama, tilem, was panganten, pepedan, piodalan ring kahyangan desa miwah rerainan jagat taler nganutin atiwa-tiwa ring desa;

ca. Sajeroning bebanjaran miwah desa adat :

1) Yening jagi mendem sawa utawi ngaben kekalih ring setra tunggal, sane nampekan patut kemargiang pinih dumun;

2) Nenten kadadosang mendem utawi ngaben tatiga sarahina ring setra tunggal, kekalih patut kependem utawi keaben ring setra asiki, malih adiri kaetang antuk prajuru desa;

3) Tan dados ngajangin sawa miwah ngirim sawa, indik puniki patut kaetang antuk prajuru;

ra. Rare lina kari ngadut udel tan ngerereh dewasa (kabawos pamali);

ka. Indik upakara mendem, ngaben, nebusin, ngendag ring setra kaler utawi kelod, pengacine sekadi patut tan kawenang ngawewehin;

- da. Prade wenten warga dura desa pacang ngangge setra kaler/kelod, patut keni penanjung batu 200 Kg nganutin pengangan beras maweweh upakara sepatutnia;
- Prade wenten warga dura desa pecak saking Kekeran, pacang ngangge setra kaler/kelod, patut keni penanjung batu 100 Kg nganutin pengangan beras maweweh upakara sepatutnia;
- ta. Prade wenten sawa ring wewidangan desa adat Kekeran sane tan kapariangken wiadin tan kaelingan, pinih ajeng patut kasadokan ring sang angawa rat, risampun puput paindikania kapatut desa mendem sawa punika sane kasukserah ring banjar sane ngawidangin maruntutan upakara manut sastra agama sasidan-sidan;
- sa. Prade jagi atiwa-tiwa sawa sane sampun mapendem, nenten kapatutang ngagah malih;
- wa. Ring desa adat Kekeran tan kawenangang ngewangun undung-undung utawi kuburan permanen;
- la. Kuburan pahlawan prade sawane sampun kagingsiran utawi kaaben, patut undung-undung inucap kagubar utawi kacapuh;
- Prade kapurug wenang kagubar olih krama banjar/desa tur sang makusara keni pamidanda sanistane patch ring prabya ngubar gagumuk inucap;

Pawos 12

(1) Sane kasinanggeh kacuntakan sekadi ring sor :

ha. Cuntaka sangkaning kalayu sekaran/padem;

- na. Cuntaka sangkaning ngraja sewala;
- ca. Cuntaka sangkaning ngembasang putra;
- ra. Cuntaka sangkaning karuron;
- ka. Cuntaka sangkaning pawiwahan;
- da. Cuntaka sangkaning gamia gamana;
- ta. Cuntaka sangkaning salah timpal;
- sa. Cuntaka prade wenten anak istri mobot nenten kaupakara pabiakawonan tur
pawidhi widhana;
- wa. Cuntaka sangkaning mamitra ngalang;
- la. Cuntaka sangkaning wenten anak istri ngawentenang putra sadurung maupakara,
pabiakawonan tur pawidhi widhana;
- ma. Cuntaka antuk sakit ila, buduh;
- ga. Cuntaka antuk sad tatayi;

(2) Sengker cuntaka manut kawentenanya :

- ha. Cuntaka kalayu sekaran, cuntakanya kantos masapuh-sapuh manut dresta;
- na. Cuntaka ngraja sewala, 3 rahina ngawit saking ngraja sewala utawi salaminang
ngraja sewala;

- ca. Cuntaka ngembasang putra, 42 rahina (abulan pitung dina) ngawit saking putrane embas, utawi ngantos sampun kaupakara makambuhan tur maprayascita manut agama, lanang wiadin istri;
- ra. Cuntaka sangkaning karuron abulan pitung dina (42 rahina) tur sampun maprayascita;
- ka. Cuntaka sangkaning pawiwahan, cuntakanya ngantos sasampun kamar gang pabiakawonan;
- da. Cuntaka sangkaning gamia gamana, cuntakanya ngantos sasampune ka palasang/masapihan tur sampun kawentenang pamrayascita raga miwah pamrayascita desa adat/pakraman lan kahyangan;
- ta. Cuntaka sangkaning salah timpal kapuputang sakadi ring Agama Hindu tur dresta miwah adat sane manggeh;
- sa. Cuntaka sangkaning anak istri mobot nenten madasar antuk ngamargiang upacara pabiakawonan, cuntakannia ngantos kawentenang upacara pabia kawonan;
- wa. Cuntaka sangkaning mamitra ngalang cuntakanya ngantos kawentenang pamargi parabian lan kamargiang upacara pabiakawonan;
- la. Ngembasang putra nenten kawentenang upacara pawidhi widhana, cuntaka ngantos wenten putrane mamera sang putra, tur sampun kawentenang upacara manut sastra Agama Hindu;
- ma. Cuntaka sad tetayi cuntakania ngantos sampun meprayascita raga tur nenten pisan dados ngamunggahang upakara pawidijatian;

(3) Cuntaka sangkaning kalayu- sekaran utawi sangkaning lampus.

ha. Mapendem cuntakan nyane :

1) Cuntaka/sebel banjar rawuhing 3 rahina riwusan mendem utawi sasampun polih prayascita (masapuh-sapuh);

2) Kaluarganya sajeroning pakarangan ngantos roras rahina.

na. Atiwa-tiwa utawi ngaben cuntakania :

Sang nyambut karya Pitra Yadnya cuntakanya ngawit saking ngarancang karya rawuh riwus yadnyania (mapegat);

(4) Sane ketiba cuntaka luwire :

ha. Sane kelayu sekaran;

na. Kawulawargania;

ca. Bebanjaran;

(5) Tan keneng cuntaka luwire :

ha. Sang sulinggih, mangku kahyangan desa lan mangku pepeletan;

na. Rikala piodalan risampun ngalang sasih/ngalang tengah;

ສິດທິ
ທິດທິດ

- ca. Sang ngawa rat minakadi : bandesa adat, kelian pura, kelian dinas, kelian adat, panitia karya, sekaa gong, sekaa santi lan tukang banten (serati/tapini);

Pawos 13

ສິດທິ
ທິດທິດ

- (1) Atiwa-tiwa (pangabenan) kamargiang antuk :

- ha. Nyawa Resi utawi nenten ngupapira sawa, santukan tan ngagah utawi manawi sawa tan kakeniang;

- na. Sawa prateka;

ສິດທິ
ທິດທິດ

- (2) Panemaya pangabenan wenten 2 pawos :

- ha. Ngaben dadakan (bah bangun), kadadosang sajeroning 3 (tiga) rahina utawi 7 (pitu) rahina, yening tan wenten kapialangan padewasan;

ສິດທິ
ທິດທິດ

- na. Ngaben lan memukur ngamasa sejeroning desa adat nganutin akeh sawa sekirangne 50 (seket) sawa, utawi sampun wenten 4 (petang) warsa;

ສິດທິ
ທິດທິດ

- (3) Dudonan pangabenan ngawit saking ngendag utawi lina, ngeseng ngantos pangiriman utawi nganyut wiadin pemuput jantos memukur;

ສິດທິ
ທິດທິດ

Pawos 14

(1) Papatusan pangabenan wenten kalih pawos :

ha. Ngaben lan memukur ngamasa utawi ngerit patus nyane manut dresta miwah awig-awig desa adat;

na. Ngaben dadakan, patus nyane pateh sakadi patus padem mapendem lan kanutang ring dresta soang-soang banjar;

(2) Pangingune ring krama banjar ngawit ngayah lan abot dangan kawentenan karya;

(3) Sang sane makta bebaktan/jenukan rikala wenten anak lina (mependem/ngaben) tan polih walesan punapa-punapi (budal puyung);

(4) Upacara Pitra Yadnya sajangkep nyane kamargiang mabantang antuk Awig-awig Desa Adat lan panglaksanaan nyane kamanggehang tur kamargiang manut drestan banjar soang-soang;

Palet 3

Indik Bhuta Yadnya

Pawos 15

(1) Bhuta Yadnya inggih punika upakara-upacara biakala ring prathiwi lan kahyangan, sarwa prani lan upakara-upacara ring bhuta kala;

(2) Upacara pabiakala ring sarwa prani luire :

- ha. Ring sarwa tumuwuh kamargiang rikala Tumpek Pangatag (Saniscara Kliwon Wariga);
- na. Ring sarwa ingon-ingon rikala Tumpek Andang (Saniscara Kliwon Uye);
- ca. Ring sarwa lanying rikala Tumpek Landep (Saniscara Kliwon Landep);
- ra. Ring sarwa ringgit rikala Tumpek Wayang (Saniscara Kliwon Wayang);

(3) Upacara pakala-kalan manusa manut wiguna kabawos pabiakala;

(4) Upacara pabiakala ring pertiwi, kahyangan lan babutan kawastanin macaru;

Pacaruan inucap ring ajeng nista, madya, utama manut wiguna kadi ring sor:

- ha. Eka Sata;
- na. Panca Sata;
- ca. Panca Sanak;
- ra. Panca Kelud;
- ka. Resi Gana;
- da. Tawur Agung;
- ta. Balik Sumpah;

(5) Sajawaning kadi ring ajeng taler kawentenang upacara :

ha. Majot-jotan utawi yadnya sesa nyabran sasampun wusan maratengan;

na. Masapuh-sapuh ri kala pacang wali ring pura;

Pawos 16

(1) Nangken ngawarsa rikalaning Tilem Kasanga kawentenang Tawur Kasanga, katah kabawos ngrupuk, maka cihna pacang mapag rahina Panyepian benjangne.

(2) Upacara Penyepian sasampun kamargiang pangrupukan benjang nyane patut kamargiang catur brata panyepian, luih ipun :

ha. Amati geni : tan kengin ma - api-api;

na. Amati karya : tan kengin nyambut karya;

ca. Amati lalangan : tan kengin maoneng-onengan, masuara ghora,
maklecan lan sapanunggilan ipun;

ra. Amati lelungan : tan kengin malancaran merika-meriki;

(3) Pabraton inucap kamargiang saking semeng ngantos semeng benjang nyane.

ᮊᮧᮒᮧᮒᮧᮒ
ᮊᮧᮒᮧᮒᮧᮒ
ᮊᮧᮒᮧᮒᮧᮒ
ᮊᮧᮒᮧᮒᮧᮒ

- (4) Sang mamurug kecaping ring ajeng keni pamidanda manut pararem ring banjar/tempek soang-soang. sane kamargiang antuk patilik desa (pecalang desa), sejawaning sang sane polih ngemit kesutreptining desa/banjar, sang kebyantakan, metepetan sungkan, madruwe rare alit, ngebag watang, miwah pekewuh-pekewuh sane tiosan;
- (5) Riwus rahina Nyepi (benjangne) kewastanin Ngembak Gni maka cihna pangawit Icaka Warsa Anyar, patut soang-soang warga desa sami saling ngaksama (Dharma Santhi).

Palet 4

Indik Manusa Yadnya

Pawos 17

ᮊᮧᮒᮧᮒᮧᮒ

- (1) Manusa Yadnya inggih punika upakara-upakara, dharmaning manusa, ngawit saking kamargiang dharmaning mapawarangan ngantos kamargiang upacara pawintenan;
- (2) Upacara kadi ring ajeng madudonan sakadi ring sor :
- ha. Magedong-gedongan kamargiang risampun bobotane mayusa 6 sasih;
 - na. Duk rare medal utawi embas (lekad rare) upakarania mabuhu, dapetan;
 - ca. Kepus udel upakarania penelah, prayascita;
 - ra. Roras rahina;
 - ka. Tutug akambuhan (42 rahina)/abulan pitung rahina

ᮊᮧᮒᮧᮒᮧᮒ

ᮊᮧᮒᮧᮒᮧᮒ

Upakaranya mecolong, nyepih, nyepuh, dapetan

Pemargi pecolongan sepatutne ring Bhetara :

1) Wisnu ring telabah;

2) Brahma ring pewaregan;

3) Pemerajan;

da. Tigang sasih (3 sasih) utawi nyambutin;

ta. Pawetuan/otonan (6 sasih);

sa. Tutug kelih (ngraja wadone, ngembakin lanange);

wa. Matatah/mapandes;

la. Mawiwaha/medengen-dengen;

ma. Mawinten pawisayan;

(3) Upakara-upacara inucap nista, madya lan utama manut sastra agama saha catur dresta, maka buatan desa dresta, ngawinang sima cara desa;

Palet 5

Indik Resi Yadnya

Pawos 18

- (1) Sang pacang madeg sulinggih utawi pandita sane kabawos dwi jati utawi sang sadaka saluwire jagi ngenterang yadnya patut masadok ring prajuru desa, kalih Parisadha Hindu Dharma;
- (2) Sang pacang madeg pemangku utawi pinandita, pemangku sonteng saluwire jagi ngenterang yadnya patut masadok ring prajuru desa;
- (3) Prajuru desa patut nitenin tur wenang ngalangin prade wenten kacihna lempas ring kakecap miwah drestane, tur sareng nyaksinin upacara saha nyobyahang ring paruman desa tegap rawuhing wates kawenangan pangenter yadnya.
- (4) Krama desa patut ngaturang ayah sapamadeg miwah ring panglepasan sang sulinggih riwekas sane katuntun antuk prajuru;
- (5) Sepatute prajuru desane patut digelis ngutsahayang mangda parab sang mediksa punika ring sahanan ilikita kagentos antuk biseka kawikon, manut panugrahan nabenia, saha nyiarang ring paruman desa miwah banjar;

Pawos 19

- (1) Sang Sulinggih patut ngarihinan ngayomin pamargin upacara ring wawidangan jagat Desa Adat Kekeran sasampun punika wawu muputang yadnya kajebar jagat tiosan utawi kadura desa;

- (2) Krama Desa sareng nitenin katuntun antuk prajuru, mangda sahanan yadnya sane kamargiang kaicen pamuput olih sulinggih, Pandita utawi Pinandita manut kawenanganya soang-soang;
- (3) Prade wenten ngelempasin bilih-bilih pastika nyumukan, prajuru wenang ngalengin utawi ngurungang yadnya inucap, prade ketelanjur yadnya saha palawesania sinanggeh tan wenten sah;
- (4) Sang ngelempasin utawi nistaang patut ketiwakang pamidanda olih prajuru, ageng alit manut dosania;
- (5) Prade sang ketiwakang tan manut ring pamutus prajuru wenang nunas bawos ring sang rumawos (Parisada Hindu Dharma) sane patut ngicening pamutus, pamekas tan wenten wicara malih;
- (6) Pemangku Kahyangan Desa utawi pemangku pura pepeletan, kesangaskara utawi kewinten antuk desa utawi pemaksan;
- (7) Menawita krama desa wenten sane medruwe pependeman, kedadosan nyarengin upakara pengabenan pemangku inucap;

SARGAH EMPAT

SUKERTHA TATA PAWONGAN

Palet 1

Indik Krama

Pawos 20

- (1) Sane kabawos krama desa inggih punika kulawarga sane magama Hindu saha ngamong karang desa utawi jumenek mapaumahan ring wawidangan Desa Adat Kekeran;
- (2) Sajaba punika sinanggeh tamiu, sane kabinayang dados kalih, inggih punika sane magama Hindu miwah siosan Hindu, sane dudonan ipun makadi ring sor :
 - ha. Krama Adat inggih punika, krama sané nyarengin adat, magama Hindu , sampun marabian lan tedun mabanjar Adat, mipil tur sareng nyungkemin Kahyangan Tiga, Desa Adat Kekeran;
 - na. Krama Tamiu inggih punika, krama saking dura Desa Adat Kekeran, sane magama Hindu, nenten mipil sakewanten sareng nyungkemin Kahyangan Tiga lan nganutin dresta Desa Adat Kekeran;
 - ca. Tamiu, inggih punika kulawarga sane nenten magama Hindu, jenek ring wawidangan Desa Adat Kekeran lan wantah sareng nyungkemin ring pawongan lan palemahan Desa Adat kewanten.

Warga Tamiu sane jenek ring asasih mangda tinut ring awig-awig tur yaning langkung ring asasih kapatutang ngerereh Ilikita ring prajuru adat;

Warga Tamiu sane jenek tur meduwe pekubon ring wewidangan Desa Adat Kekeran patut tedun mekrama Adat.

Pawos 21

Krama Desa Adat Kekeran wenten 4 (petang) soroh:

(1) Krama Wedan : krama sane sampun jumenek tur madesa adat wit saking kaluhuranya;

(2) Krama Ngarep inggih punika kulawarga sane malarapan wed utawi pangrawuh saking warga desa siosan saha ajeg pawiwahania;

(3) Krama Tan Ngarep, luwire :

ha. Krama Paron : krama saking dura desa sane sampun masadok ring prajuru banjar lan desa, lan sampun madruwe tanah karang paumahan, tur sampun jenek ngawit 6 (nem) sasih nyantos 10 (dasa) warsa;

na. Krama Panyade : krama sane mewiwit saking Desa Adat Kekeran sane sampun matilar dados krama adat Desa Adat siosan, nanging waris ipun kantun ring Desa Adat Kekeran turmaning mawali malih dados krama Desa Adat Kekeran;

ca. Krama Pangele inggih punika krama desa adat Kekeran, utawi krama saking dura desa sane wenten pakilitan ring krama wedan lan jumenek ring krama wedan;

ra. Krama daa taruna inggih punika krama sane mayusa 15 nyantos 30 warsa sane durung marabian;

ka. Krama datu : krama sane mayusa lintangan ring 30 warsa tur nenten naenin ngamargiang kramaning alaki rabi nyantos lampus;

(4) Krama Balu inggih punika krama sane katinggalin sangkaning sane istri utawi sane lanang padem utawi sangkaning nyapihan. Krama balu kepah dados 4 (petang) soroh :

ha. Balu makrambian : Balu sane sampun madruwe pianak cucu, durung marabian;

na. Balu ngempu : Balu sane madruwe pianak kanton alit;

ca. Balu ngatung : Balu sane nenten madruwe pianak utawi santana;

ra. Balu ngelisting : Balu sane nenten madruwe pianak, arta warisan lan sameton.

Pawos 22

Tata caraning ngaranjing dados krama desa :

(1) Ngawit dados krama desa inggih punika :

ha. Sangkaning ngamong karang desa;

na. Mawiwit pawiwahan;

(2) Panemaya tedun makrama desa :

ha. Nemoning peparuman rutin desa adat kaler utawi kelod;

na. Mepejati ring Puseh / Desa;

(3) Sang saking séwosan désa yaning sareng tedun makrama désa ring Désa Adat patut

keni pecingkrem, sané ageng nyané kasulurang manut pararem;

(4) Yan wénten krama saking séwosan désa sareng ngranjing makrama désa ring Désa

Adat patut kadulurin antuk ilikita saking desa wed nyane sané tegap lan jangkep;

Tata caraning ngaranjing dados tamiu :

(1) Masadok ring Kelian Banjar manut ring pikamkam kadinasan;

(2) Naur prabea manut pararem soang-soang banjar;

Pawos 23

Tategenan miwah swadarma krama Desa Adat/pakraman luire :

(1) Tategenan krama luire :

ha. Krama ngarep, keni urunan miwah ayahan mamungkul;

na. Krama balu, keni ayah manut kawonganya :

1) Balu ngelisting, lanang utawi istri keni ayahan lanang utawi istri.

- 2) Balu makrambian, lanang utawi istri sane madruwe santana lanang utawi istri sekiranya mayusa 17 (pitulas) warsa utawi nganutin pararem soang-soang banjar, keni ayahan balu;
- 3) Balu Nyapian, kadadosang luput ayah manut arah-arahan banjar/Desa Adat/Pakraman yening balu lanang ayah lanang, balu istri ayah istri;

(2) Krama Desa Adat/pakraman kadadosang:

ha. Mapuankid utawi tan tedun ngayah luire :

- 1) Ritatkala mapawangunan/nasarin. ngerebin sanggah, piasan, bale daja, bale dangin, bale dauh, klumpu miwah pawon;
- 2) Ritatkala mayadnya, ngotonin, nyakapang, masangih, mapasaksi, kicalan putra, sakit lan patirtan;
- 3) Maluasan utawi ngaluang;
- 4) Matepetin lan siosan, matepetin selami asasih;
- 5) Mapuankid sakit salami (tigang) rahina, nenten dados medal, yaning sampun arahina kenak (seger) mangda masadok ring prajuru;

na. Nyada mapiteges wusan ngayah, ri sampun mayusa 70 (pitung dasa) warsa utawi lintang;

ca. Panyeledihi nyade wiadin nyuksukin ayah ri sampun mayusa 17 (pitulas) warsa;

(3) Swadharmaning Krama Adat, luwiré :

- ha. Satinut ring sadaging Awig-awig, Pararem lan Pasuara Désa Adat;
- na. Tan maren sareng mautsaha, mangda désané prasida nyujur patitis ring ajeng;
- ca. Sayaga sareng natakin panes tis kértiyasan Désa Adat;
- ra. Keni paturunan, peson-peson lan ayahan mamungkul;
- ka. Nenten dados ngeranjing anggota ormas sane nenten kasungkemin ring krama
agung Desa Adat Kekeran;

(4) Swadharmaning Krama Tamiu inggih punika :

- ha. Satinut ring tatiwak Désa Adat ngeninin indik ngupadi kasukertan Désa Adat
ring sekala niskala;
- na. Tan kéngin nungkasin kértiyasan Désa Adat.
- ca. Patut masadok ring kelian banjar ritatkala narima tamiu nyantos lintang ring 24
jam;
- ra. Ngaturang punia lan ayah ring parhyangan manut kabuatan;
- ka. Nenten dados ngeranjing anggota ormas sane nenten kasungkemin ring krama
agung Desa Adat Kekeran;

(5) Swadharmaning Tamiu, inggih punika :

- ha. Satinut ring tatiwak Desa Adat ngeninin indik pawongan lan palemahan;
- na. Tan kengin nungkasin kertiyasan Desa Adat;
- ca. Patut masadok ring kelian banjar ritatkala narima tamiu nyantos lintangan ring 24 jam;
- ra. Keni punia manut pararem soang-soang banjar;
- ka. Nenten dados ngeranjing anggota ormas sane nenten kasungkemin ring krama agung Desa Adat Kekeran;

Sang memurug kecaping ring ajeng pemekas sane nomer (3), (4), (5) aksara (ka) keni pamidanda manut pararem;

Pawos 24

Kapatutan krama lan tamiu :

(1) Kapatutan Krama Adat sakadi ring sor :

- ha. Polih pasayuban saking desa;
- na. Polih kasukertan miwah kasucian déwék, parhyangan miwah karang nyané;

- ca. Polih kasukertan padruwén nyané sowang-sowang;
- ra. Ngamedalang usul ritatkala wenten paruman ring desa sane mabuat;
- ka. Dados prajuru ring banjar utawi desa;
- da. Polih pamutus saking prajuru ritatkala wenten wicara;
- ta. Polih laluputan;

(2) Keputusan Krama Tamiu :

- ha. Dados madana punia ring Desa / Bañjar Adat;
- na. Polih pasayuban marupa pitulung rikañjekan katibén pañcabhaya;
- ca. Polih pamutus saking prajuru ritatkala wenten wicara;

(3) Keputusan Tamiu :

- ha. Dados madana punia ring Desa / Bañjar Adat;
- na. Polih pasayuban marupa pitulung rikañjekan katibén pañcabhaya;
- ca. Polih pamutus saking prajuru ritatkala wenten wicara;

- (4) Sinalih tunggil Krama Désa lan tamiu tan kadadosang ngajak wong wadon tuna susila ngranjing miwah ngrerep ring wewidangan Désa Adat, sapasira ugi sané piwal, patut keni pamidanda **manut pararem**;

- (5) Krama desa lan tamiu tan kadadosang makta, nganggen, madruwe sarana, sane ten manut ring uger-uger Guru Wisesa, sapisira ugi sane tiwal, patut keni pamidanda

manut pararem;

Pawos 25

Wusan dados Krama Désa :

- (1) Sangkaning :

ha. Séda utawi lampus;

na. Pinunas ngaraga;

ca. Kanorayang, malantaran piwal ring Awig-awig miwah Pararem Désa, utawi tan satinut ring pituduh Prajuru sajeroning indik nyupat sikian, minakadi nénten prasida ngeséhin prawerti;

- (2) Sang wusan dados krama désa taler kabawos wusan mabanjar, mangda nenten kabawos empak ngulanting;

- (3) Sang wusan dados krama désa tan polih pah-pahan druwén désa utawi banjar, tur tan polih pasayuban malih sajeroning ala-ayu;

- (4) Sang kanorayang dados malih tedun makrama désa yaning sampun maseh parisolah ipun tur malarapan antuk katerima ring banjar adat sowang-sowang, maweweh pamogpog manut pararem banjar;

- (5) Prade sangkaning rahayu, polih lekita bukti patilar saking prajuru desa;
- (6) Sinalih tunggil kerama desa wusan makerama desa prade keluarga inucap :
- ha. Magingsir linggih saking desa utawi transmigrasi patut karang desa punika kapiserah ring waris nyane, banjar utawi desa;
- na. Ninggal sesana patut nyerahang druwen desa;

Pawos 26

Ayah-ayahan krama.

- (1) Satunggil krama, manut paetangan nyane, keni ayah-ayah sekadi ring sor :
- ha. Ayahan utama inggih punika ayah sane kamargiang olih krama sane ngamargiang swadharma eka jati utawi dwijati.
- na. Ayahan ngarep inggih punika ayah sane kamargiang olih krama sane dados krama adat, sane jangkep alaki rabi. Ayahan ngarep mapiteges paturunan, peson-peson miwah ayahan mamungkul;
- ca. Ayahan balu inggih punika ayah sane kamargiang olih krama balu sekadi ring sor :
- 1). Balu makrambian, keni ayah balu lan urunan sepatut;
- 2). Balu ngempu, keni ayah balu lan urunan aparo;

3). Balu ngatung, tan keni ayah, nanging keni urunan aparo;

4). Balu ngelisting, urunan luput manuk;

ra. Ayahan daa truna manut dedauhan;

(2) Soang-soang ayahan punika wantah kamargiang siki kemanten, manut kawentenan krama inucap;

(3) Sahananing krama sané sampun munggah daa truna, soang-soang patut sareng ngayah sané kawastanin ayah daa truna;

(4) Ayah daa truna punika kapupulang sajeroning Sekaa Truna;

(5) Sekaa Truna punika patut wénten ring soang-soang Banjar Adat;

(6) Krama Adat wenang nyada ayah, sané mates ges mademang ayahan, yan sampun kapastika, luwiré :

ha. Sungkan tahunan;

na. Yan sampun madruwe pangentos utawi panyeledihi;

ca. Risampun mayusa 70 warsa;

(7) Krama Adat kadadosang :

ha. Mapuankid utawi tan tedun ngayah / parum :

1). Rikala nangun yadnya, kaluwasan masengker déwasa;

2). Keni dadawuhan saking Guru Wisésa;

3). Kapyalang, luwiré : sungkan, matepetin, kalayusekaran, lan sakancan punika;

na. Dados nyudi patajuh (kawakilang) ring warga/krama tiosan, sané sampun mungguh daa truna;

Pawos 27

Tata titi Krama Desa utawi Tamiu, sane nampi krama tamiu utawi tamiu :

(1) Krama Desa utawi tamiu sané nampi krama tamiu utawi tamiu jantos marerep- an :

ha. Mangda masadok ring kelian banjar, arahina saking ngawit marerepan ring genah sang narima;

na. Yaning krama tamiu utawi tamiu punika madunungan rawuh asasih, Kelian Banjar patut nuréksain kabuatan nyané madunungan, kaadungang ring ilikita sané ninasang kabuatan ipuné;

(2) Yening kabuatan nyané tan manut ring sané katinasang, Kelian Banjar wenang ngawaliang krama tamiu utawi tamiu punika;

(3) Yaning krama tamiu utawi tamiu punika jenek rawuhing a sasih taler durung kasadokang, krama desa utawi tamiu sané nampi patut keni pamidanda **manut pararem**;

Palet 2

Pamucuk Desa

Pawos 28

Pamucuk Desa Adat inggih punika :

- (1) Sabha Desa.
- (2) Kertha Desa (keadegang manut kabuatan).
- (3) Prajuru Desa.

Sabha Desa

Pawos 29

- (1) Sabha Desa, inggih punika paruman desa sane taler kabawos paruman agung desa adat sane kamiletin antuk krama maka sami miwah prajuru adat sami sane matatujon pacang nepasin sahananing wicara sane mawiwit saking awig-awig lan sane mapakilitan ring tata adat, agama, budaya miwah sahananing pidabdab pewangunan ring desa adat sane muatang pamutus ring sajeroning paruman agung;
- (2) Manut makadi dresta sane manggeh ring adat, sahananing pamutus-pamutus sane kamedalang tur kamanggehang ring desa adat dumogi panglaksanaan adat-istiadat prasida mamargi ajeg patut kaputusan ring sajeroning paruman desa sane mawasta sabha desa;

Kertha Desa

Pawos 30

- (1) Kertha Desa inggih punika genah prajuru desa lan krama desa adat nunas dharma tatimbang yening wenten nepasin daging awig-awig;
- (2) Swadharma Kertha Desa, wenang mapaica saluwuring dharma tatimbang ring Prajuru Desa, makadi :

ha. Indik prajuru desa sane singsal ngemargiang awig – awig;

na. Indik krama desa sane pacang nguwah nguwhin awig-awig Desa Adat;

ca. Indik wenten wicara ring Desa Adat sane kasengguh perkara;
- (3) Kertha Desa patut ngicenin dharma tatimbang lan ngawantu prajuru desa lan krama desa yening wenten pikobet indik pamargin awig-awig;

Tatacara Ngadegang Kertha Desa

Pawos 31

- (1) Kertha Desa akeh nyane 1 diri nyantos 3 diri, manut kabuatan;
- (2) Sane dados kadegang Kertha Desa luwirnya :

- ha. Mawiwit saking krama ngarep, naenin dados prajuru desa;
- na. Wikan ring hukum adat / agama lan hukum Nasional;
- ca. Ritatkala kacawis, mayusa sakirangnya 40 warsa,
- ra. Kasudi olih Prajuru Desa, utawi Tedung/Pamucuk Desa suwen nyane dados
Kertha Desa 5 warsa;

Prajuru Desa

Pawos 32

(1) Sane kasinanggeh Prajuru Desa inggih punika :

- ha. Bandesa;
- na. Patajuh/Pangliman;
- ca. Panyarikan;
- ra. Patengen;
- ka. Kesiroman Desa (Kelian Adat soang-soang banjar);

(2) Prajuru Desa/Banjar patut :

- ha. Mawiwit saking krama ngarep;

- na. Waras lan tan cacad angga pramana;
- ca. Maparilaksana becik lan nenten cacad hukum;
- ra. Jujur, pradnyan, wicaksana lan madruwe pangunadika, lascarya ngayah;

Tatacara Ngadegang Prajuru Desa

Pawos 33

(1) Tatacara Ngadegang Prajuru Desa :

- ha. Soang Banjar dados ngusulang 1 (siki) calon bandesa mawiwit saking krama ngarep;
- na. Kawentenang prawartaka pemilihan, kamanggalaning antuk Prajuru Desa sane lawas, kawantu olih kelian / prajuru banjar sane kasudi;
- ca. Calon saking prajuru banjar kaselehin antuk prawartaka, raris kapastika wenten 3 - 5 calon bandesa;
- ra. Pemilihan kamargiang ring wantilan pura desa utawi pura puseh makamiwah genah sané tiosan sane kecumponin antuk krama desa adat Kekeran, soang-soang kelian banjar patut nitenin lan nureksain pamargi pemilihan bandesa inucap;
- ka. Calon sane kacawis paling makweh sane jayanti;
- da. Bandesa wenang nyudi pangabih nyane;

- (2) Prajuru Desa kaadegang 5 warsa apisan olih Paruman Agung Desa Adat;
- (3) Prajuru sané wawu kepilih kaupasaksiang ring Pura Kahyangan Tiga utawi ring Pura Bale Agung;
- (4) Sajawaning wénten parindikan sios, sang sampun puputing panumaya dados Prajuru, kéngin kapilih malih;
- (5) Prade Bandesa Adat mararyan, sadurung panumayan ipun, swadarman nyane kamargiang olih pangliman utawi petajuh nyane sedurung kaadegang Bandesa Adat sane anyar;

Pawos 34

- (1) Ritatkala ngamargiang kasukerthan Desa Adat, Bandésa kawantu olih :
 - ha. Pangliman/Patajuh, pinaka Wakil Bandésa;
 - na. Panyarikan, pinaka Juru Surat;
 - ca. Patengen, pinaka Pangamong Druwén Désa;
 - ra. Kasinoman pinaka Juru Arah (Kelian-kelian Banjar Adat);
 - ka. Pecalang sane nreptiang pamargi ritatkala wenten karya adat, budaya lan agama Hindu;
 - da. Prajuru ring soang-soang Pura Desa, Puseh, Dalem lan sane tiosan sane dados amongan utawi panyiwian desa;

- (2) Ritatkala ngénterang kasukertan ring niskala, Bandésa patut masinggihang Pamangku Kahyangan Tiga miwah kahyangan desa tiosan;
- (3) Indik tata titi ngadegang pecalang, swadarmen lan patitis ipun, kamanggehang saking soang-soang banjar adat;

Pawos 35

- (1) Swadharmaning Bandésa Adat, inggih punika :

- ha. Ngénterang paruman-paruman Désa Adat;
- na. Ngénterang panglaksanaan sadaging Awig-awig miwah pamutus-pamutus Krama Désa, sané sinanggeh Pararem;
- ca. Ngaraksa miwah nudonang tata-titiné migunayang arta brana druwén Désa;
- ra. Nuntun saha ngénterang Krama Désa rawuhing warga Désa sami, ngu- padi kasukertan sekala lan niskala;
- ka. Nuntun saha nyaksi upacara sangsaraning kahuripan sané mabuat;
- da. Nuntun saha ngénterang Warga Désa, nginggilang Sang Hyang Agama, kasucian Kahyangan, kasucian Palemahan, kasucian Pawongan, miwah tata-titiné migunayang Sétra;
- ta. Mawosin miwah niwakang pamutus marep ring wicara krama;
- sa. Maka Duta Désa Adat, matemuang babawos ring sapisira ugi;
- wa. Lan sané séwosan sané wénten pakilitan nyane ring Désa Adat;

- (2) Tata-titiné ngalaksanayang swadharma inucap ring ajeng, tan maren patut sati- nut ring daging Awig-awig, Pararem, dresta miwah pamutus paruman krama Désa Adat;
- (3) Panglaksanané ring ajeng patut kasobyahang ring Désa Adat, kapungkur ipun;
- (4) Sumakuta utawi sumanggup natak pamutus paruman Krama Désa Adat, ngenenin swadharman sowang-sowang prajuru;

Pawos 36

Swadarman Patajuh inggih punika ngawantu Bandesa ring widang Parhyangan, Pawongan lan Palemahan;

Pawos 37

Swadarman Penyarikan inggih punika ngawantu Bandesa ngaryanin saluir sewalapatra, nyatet inventaris desa tur nyuratang saluiring pamutus pangrawos desa ring sangkepan;

Pawos 38

Swadarman Patengen inggih punika ngawantu Bandesa ngaryanin utawi ngarincik sakaluwir pangranjing miwah pamedal jinah Desa Adat lan ngupapira padruwen Desa Adat;

Pawos 39

Swadarman Kasinoman Desa, ngewantu Bandesa nyobyahang sewalapatra utawi pamutus pengerawos desa ring tempekan desa;

Pawos 40

Swadarman Pecalang Desa ngawantu Bandesa nreptiang pamargin upakara yadnya, dharmaning Agama lan Dharmaning Negara;

Pawos 41

Patias utawi olih-olihan lan leluputan Pamucuk Désa Adat utawi Banjar :

- ha. Luput sekeluwiring pepeson;
- na. Ancel sahanan duman;
- ca. Olih-olihan Bandesa Adat manut daging pararem desa;

Pawos 42

(1) Wusan dados Pamucuk Désa Adat, sangkaning :

- ha. Lina, padem;
- na. Pinunas ngaraga;
- ca. Swadharman nyane sampun puputing sengker;
- ra. Kawusanang / kanorayang olih krama désa duaning iwang pamargi, manawi nilar sesana utawi malaksana asta dusta;

(2) Ngentosin, ngwusanang utawi nganorayang Pamucuk Désa Adat, patut kamargiang sajeroning Paruman Agung Désa Adat;

Pawos 43

Petias utawi olih-olihan prajuru desa luire :

- (1) Luput rarampen (peson-peson);
- (2) Polih tanding tengah;
- (3) Petias siosan manut pararem;

Palet 3

Indik Kukul

Pawos 44

- (1) Kukul ring desa luire :

ha Kukul desa;

na. Kukul pura;

ca. Kukul banjar/tempekan;

ra. Kukul sekaa-sekaa;

- (2) Tabuh tatepakan kukul desa:

ha. Atuludan lamban, tatengeran tedun ngayah utawi upakara yadnya;

na. Atuludan bulus, tatengeran kapancabhayan;

- (3) Tengeran kukul ring soang-soang bebanjaran:

- ha. Sinalih tunggil warga desa utawi banjar madruwe oka, ping pisan nungkak;
- na. Sinalih tunggil warga desa kajuang nganten, ping kalih nungkak;
- ca. Sinalih tunggil warga desa utawi banjar padem, ping tiga nungkak. Yening polih petiwan-tiwan kesambung antuk suaran kulkul ngelantur;
- ra. Wnten wong desa utawi banjar kapelegandang, kabegal, kaebek, kemalingan, kelangan, suaran kulkul bulus tigang tulud ngelantur;
- ka. Umah puwun suaran kulkule bulus atulud ngelantur;

Pawos 45

- (1) Kulkul desa utawi banjar tan wenang katepak yening tan sangkaning pituduh desa, sajawaning tengeran kapancabhayan;
- (2) Sang nepak tan sangkaning pituduh patut digelis atur supeksa maka buatan panepake, yan tan sapunika wenang sang mamurug kadanda **manut pararem**;
- (3) Kulkul sekaa-sekaa, samalih kulkul pondokan tan kalugra nyawerin sukat utawi tengeran kulkul desa/banjar prade mamurug taler kadanda **manut pararem**;

Palet 4

Indik Paruman

Pawos 46

(1) Paruman/sagkepan ring Desa Adat Kekeran, wenten :

ha. Paruman desa/banjar kawentenang :

1) Paruman desa kewentenang 6 sasih apisan, paruman banjar nyabran ngasasih, maka cihna tan parah-arrah, duaning sampun tetep panumaya manut pararem babanjaran soang-soang;

2) Napkala (patgata kala) maka jalaran arah-arrah manut tatujon;

na. Sangkepan prajuru/dulu desa, kawentenang manut wiguna;

ca. Paruman sekaa-sekaa manut babuat;

(2) Paruman desa utawi banjar madudonan sakadi ring sor :

ha. Prasida lumaksana ri sampun katedunin antuk sang patut ngamiletin kamanggala antuk tengeran kulkul miwah mabusana adat, saha tan kalugra makta gegawan lan tan maren ngarcana ring Ida Bhagawan Panyarikan maka sarana Widhi Widana Cane;

na. Maka sarana jagi pangawit kalaksanayang sep-sepan saha ri wusan nyacah kamargiang nawur dadosan gung alit manut pararem banjar soang-soang;

ca. Tan kalugra ngawetuang suara ghora utawi byuta prade wenten makadi punika patut keni pamidanda bea pecamil kadi dandaning nguman-uman (memisuh) ring sabha;

ra. Pamutus babawos briyuk sapanggul (ingkup) punika kamanggehang;

- (3) Prade daging paruman tan kacumponin mangda prajuru desa/banjar ngilikang babawos, saha putusan nyane mangda kararemang antuk krama desa/banjar, samaliha prade tan prasida kasungkemin rawuh ping tiga, prajuru banjar wenang nunas bawos manut undagan luire : kamanggeh paingkupan prajuru, ngraris panglingsir, panguntat paruman;

Pawos 47

- (1) Sajeroning paruman desa utawi banjar, Bandesa Adat utawi Kelian Adat patut nyiarang pamargi ngenterang desa/banjar, pamekas nganinin indik:

ha. Munjuk lungsuring pakraman saha ayah-ayah, pemargi, penelas miwah sulur artha brana druwen desa/banjar;

na. Rencana prajuru nganinin usaha desa/banjar kapungkur;

ca. Daging peparuman miwah pasuwaran-pasuwaran sane mabuat;

- (2) Pamutus paruman desa utawi banjar sinanggeh pararem maka pamitegep pamargin awig-awig;

- (3) Sahanan inucap ring ajeng kemanggehang sahe katiwakin pamutus antuk paruman desa utawi banjar;

- (4) Pemutus paruman inucap ring ajeng sinanggeh sepat siku-siku patut katinutin olih warga desa utawi banjar sami pemekas antuk prajuru;

- (5) Sejaba mungguh ring ajeng paruman desa utawi banjar patut taler kawentenang prade kawidi olih krama desa utawi banjar senistane tigang prapat desa utawi banjar;

- (6) Sangkewidi patut mastikayang bantang sane sandang bawosang ring paruman;
- (7) Paruman desa utawi banjar kadi puniki taler patut katiwakin pemutus kadi mungguh ring
ajeng;

Pawos 48

- (1) Paruman prajuru desa utawi banjar patut kawentenang senistane asasih apisan;
- (2) Sahanan prajuru desa utawi banjar, Bandesa Adat utawi Kelian Adat patut nedunin
paruman inucap;
- (3) Sangkepan prajuru desa/banjar kawenangang ngrincikang usaha desa/banjar kapungkur
miwah ngerencane sake luwire;
- (4) Sangkepan prajuru tan kawenang ngawedalang tategenan ring krama kaingkupin antuk
krama desa/banjar sedereng polih kapikukuhin antuk pamutus peparuman desa utawi
banjar;
- (5) Pamutus sangkepan prajuru ngawetuang paswara, maka pidaging pituduh sang
ngawiwenang ngonekang pecak pararem krama desa;
- (6) Paruman desa utawi banjar sinanggeh pengewisesa, sane wenang nyelem putihang tata
pengenter desa utawi banjar manut ring awig-awig desa utawi pararem banjar;
- (7) Sane tan prasida nyarengin peparuman kapatutang satinut ring pamutus paruman;

Palet 5

Indik Padruwen Desa

Pawos 49

(1) Padruwen Desa Adat/Pakraman Kekeran, sane kaamong Pengempon Kaler lan

Pengempon Kelod sakadi ring sor :

ha. Kahyangan Desa Pengempon Kaler :

1. Kahyangan Tiga (Pura Puseh, Desa / Bale Agung lan Pura Dalem);
2. Pelinggih Sri Sedana;
3. Pura Prajapati;
4. Pura Penataran;
5. Pura Pasucian;
6. Pelinggih Pemasaran Agung;
7. Pura Melanting (Penyosohan);

na. Kahyangan Desa Pengempon Kelod :

1. Kahyangan Tiga (Pura Desa, Bale Agung, Pura Puseh lan Pura Dalem);
2. Pura Prajapati;
3. Pura Pasucian;

4. Pelinggih Sri Sedana;
 5. Pura Penataran;
 6. Pelinggih Marga Tiga;
 7. Pelinggih Penganyutan;
- ca. Bale Desa utawi Wantilan;
- ra. Ring Desa Pengempon Kaler, carik jimbar nyane 18.10 are lan tanah tegalan jimbar nyane 21.86 are;
- ka. Karang ayahan desa (karang ring ajeng);
- da. Setra-setra palemahan inggih punika :
- Setra Desa Adat Kaler jimbar nyane 18.67 are;
 - Setra Desa Adat Kelod jimbar nyane 19.04 are;
- ta. Pelaba pura, carik/tegal malinggah :
1. Pelaba pura Kahyangan Desa Pengempon Kelod maka sami jimbar nyane 53 are inggih punika :
- ha. Pelaba Pura Desa, Puseh lan Penataran maka sami jimbar nyane 36 are

na. Pelaba Pura Dalem, Prajapati lan Pasucian maka sami jimbar nyane 17 are

2. Pelaba pura Kahyangan Desa Pengempon Kaler maka sami jimbar nyane 6.46

are

- Pelaba Pura Dalem jimbar nyane 6.46 are

sa. Lelanguan, minakadi tetabuhan lan ilen-ilen padruwen bebanjaran luire:

1) Gong soang-soang banjar; Banjar Gelagah Puwun, Banjar Delod Sema Banjar

Sangiang, Banjar Penyarikan, Banjar Delod Yeh;

2) Angklung soang-soang banjar: Banjar Delod Sema, Banjar Penyarikan lan ring

Banjar Tauman;

3) Ilen-ilen wali pura; rejang, pendet, baris, jauh;

4) Lekita-lekita, luwire pipil krama, awig-awig, paswara/pararem;

wa. LPD Desa Adat Kekeran;

la. Nyasa, sasanthi;

ma. Lan usaha sane tiosan manut pararem;

(2) Olih-olihan Desa Adat/Pakraman Kekeran luire :

ha. Olih-olihan saking palaba pura;

- na. Urunan krama desa pakraman;
- ca. Paica saking Guru Wisesa;
- ra. Hasil usaha saking LPD Desa Adat Kekeran;
- ka. Dana punia tiosan, sane patut;

Pawos 50

- (1) Prajuru desa wenang ngetangang pamupon laba pura lan sapanunggilan druwen desa;
- (2) Pikolih lan pamupon nyane kanggen prabea piodalan lan wawangunan ring pura;
- (3) Nyabran pasangkepan desa, prajuru pangamong druwe ngwentenang parindik munjuk lungsur padruwen ring krama desa;
- (4) Sakaluwir druwen desa patut wenten ilikitan nyane;
- (5) Tan kalugra ngadol utawi ngesahang druwen desa yan tan kasungkemin antuk krama desa;

Palet 6

Indik Panyanggran Banjar

Pawos 51

- (1) Krama desa ri kala karya suka-duka, patut kasanggra antuk banjar luwire :

ha. Prade ngwangun Pitra Yadnya utawi Manusa Yadnya, manut pinunas sang mayadnya;

na. Pangrombo utawi karya gotong-royong krama nganti ping tiga, salangkungan punika patut katuran pangu manut pararem soang-soang banjar;

ca. Pangu ri kala Pitra Yadnya manut abot yadnya, prade saking semengan nganti wengi, katuran pangu ping kalih;

(2) Krama sadu kengin nunas panyanggra Banjar rikala karya suka, luwire :

ha. Manusa yadnya, ngodalin ring pemerajan, lan siosan punika;

na. Pangerombo lan pangu manut kadi karya duka manut pinunas sang meyadnya;

Palet 7

Indik Pawiwahan

Pawos 52

(1) Pawiwahan inggih punika patemoning purusa pradana malarapan panunggalan kahyun suka citta utawi tresna kapitresnain kadulurin upasaksi sekala-niskala;

(2) Pamargin pawiwahan luire :

ha. Pepadikan, kamanggala antuk pakrunan;

na. Ngarorod, ngrangkat rihin wawu kakrunayang;

ca. Nyeburin utawi santana nyeburin;

(3) Tatacara pemargi pawiwahan :

ha. Pepadikan, ngelaksanayang pemargine sane tetiga :

- 1) Ngelaku, inggih punika segelise ngaku nyuang ring sang medruwe wadone;
- 2) Melaku artin rawose ngidih, melarapan antuk mekruna saking sang lanang masuwaka ring sang madruwe wadone, kewentenang pasubaya dewasa pacang sepulah-palih pawiwahanne sekala niskala;
- 3) Ngeluku, ngukuhan daging ipun mitegesang pamupute ring sekala miwah niskala, punika taler indik pasubaya pewartangan;

na. Yening pemargine ngerorod :

- 1) Pinih riin patut gelis wenten mapitahu/ngelaku saking keluarga lanange katiba ring reraman wadon;
- 2) Prade reraman sang wadon medaging sampet ring pekayun gelis mesadok ring prajuru banjar; tur dados maritetesang ring okania kesarengin antuk prajuru banjar nyane;
- 3) Pemargine maritetes patut polih kebebasan tur kesarengin antuk prajuru banjar ring genah pengerorodan punika, luwire :

ha. Pamitetesang punika tetujon ipun mangda polih gegalangan reraman sane wadon punapi sangkaning pada arsa punapi ten wenten arsan ipun, sang sane istri genahang ngeraga tan dados anak tiosan nampekin prade

kirang tigang depa tur tinas ring inangga, prajuru nuntun nyulurang
mangda reraman sane luh polih metaken ring pianak ipun;

na. Yan sampun terang sangkaning kepaksa tur sane istri tan wenten manah
ipun ring sane melaibang, prajuru wenang ngemantukang sang istri
punika ring reraman ipun;

ca. Sane lanang punika wenang danda gung arta 2.500 (duang tali limang
atus) jinah bolong asli, yan tan katerima danda punika tunasang pematut
ring guru wisesa;

ra. Nanging yen sangkaning pada arsa reraman sang wadon tan wenang
memaksa malas pianak ipun, indik punika mangda kekuatang antuk
prajuru banjar makekalih tur kawewehin antuk surat pernyataan;

ka. Selantur ipun kepatutan sang sane lanang ngemargiang tatacara
pemargin pawiwahan;

ca. Nyeburin utawi nyentana : sang sane lanang kemanggehang predana, sang sane
istri kemanggehang purusa, muang tatacara pawiwahan manut sekadi ring ajeng;

(4) Pidabdab sang pacang mawiwaha patut :

ha. Sampun manggeh daha truna (prasida nganutin Undang-Undang Perkawinan);

na. Sangkaning pada rena, (tan kapaksa);

ca. Kasudiang prade pangambile sios agama;

ra. Manut kecaping agama;

- (5) Pamargin pawiwahan mangda nganutin Undang-Undang Perkawinan saking sang ngawiwenang;

Pawos 53

- (1) Pawiwahan sane kapatutang ring desa, sakadi ring sor :

ha. Sampun kamargiang pabiakala utawi pesakapan, kasaksiang sekala-niskala, antuk sonteng, pinandita utawi pandita;

na. Wenten pasaksi prajuru sane mapakelingan utawi ngilikitayang pawiwahan;

- (2) Parabian sane tan manut kadi ring ajeng sinanggeh tan patut (tan sah);

Pawos 54

- (1) Sapa sira ugi pacang ngawarangan pakulawarganya patut masadok ring prajuru, salantur nyane prajuru maritatas, manut tan manut pamargi parabiane;

- (2) Pamargin Papadikan manut dudonan;

ha. Pakrunan rawuh ping tiga, saha soang-soang malarapan :

1) Kapertama antuk canang utawi tubungan;

2) Kaping kalih antuk canang utawi tubungan;

3) Kaping tiga antuk canang utawi tubungan, tipat bantal, kabawos pamuput papadikan.

na. Risampun mapragat raris sang istri kajak budal ring pakubon sang lanang, saha kalanturang antuk pabiakala;

ca. Mangda puput tumus sekala niskala raris kulawarga purusa makta pejati ring mrajan wadone lan ilikita patra pawiwahan (akta perkawinan) kesaksiang olih prajuru;

(3) Prade Ngerorod/Ngrangkat patut:

ha. Reraman lanange ngawentenang pamalaku antuk duta saksi sakirangnya 2 (kalih) diri;

na. Pagenahan antene tan kengin ring pakubon sang lanang sedereng mabiakala;

(4) Sajeroning Pakrunan/panglukuan patut :

ha. Kamanggala antuk geng pangampura, majeng ring reraman wadone;

na. Kaigumang bawos indik idih-pakidih utawi pategayan arep ring pasewakan sang ngidih saha dewasa pakrabkambeyane wekas;

ca. Kacihnayang indik kapurusa utawi prade santana rajeg kajejerang, kapatut ngidih anak lanang sane kabawos pawiwahan nyeburin, tur ri sampun sulur pameraan kategepin kamanggehang santana nyeburin;

ra. Prade tan terima, pejati pakrunan kamargiang jantos ping tiga;

(5) Pakrabkambean mapiteges upacara tinas apadang (tinglas) mapikuren, duaning manut sakadi ring sor :

ha. Sajeroning kabawos ambe, kalaksanayang ring sekala niskala antuk sarana jejauman miwah pawidi widana :

1) Jejauman pinaka ngambe/ngadungang kayun soang-soang pakulawangan wadonne;

2) Widhi widhana pinaka pejati niskala nunas wadone ring pamrajan kamulan nyane;

na. Sajeroning bawos kerab kambe palaksana ring sekala :

1) Antuk panyaksi krama banjar, duaning kakerabin manawi antuk tengeran kulkul;

2) Pamekas panyaksi prajuru saha ngilikitaang;

Palet 8

Indik Santana

Pawos 55

(1) Santana wenten kalih pawos, sane kaucap pratisantana miwah santana paperasan;

(2) Pratisantana inggih punika santana sane metu saking pawiwahan kapatut;

- (3) Prade pawiwahan tan ngawetuang santana kengin ngidih santana antuk upasaksi sekala niskala sane kawastanin santana paperasan;
- (4) Prade pawiwahan tan kapatut ngawetuang santana, mangda tan kantun kawastanin babinjat utawi astra patut kamanggala antuk panyangaskara;
- (5) Santana rajeg inggih punika, pratisantana wadon (pradana) sane kamanggehang lanang (purusa) tur ri sampun nglaksanayang pawiwahan nyeburin;
- (6) Sang sane karsayang santana rajeg inucap mawiwit saking :
- ha. Pratisantana wadon tunggal utawi silih sinunggil pratisantana wadon yaning makasami pratisantana wadon;
- na. Sampun kamanggehang dados pratisantana (purusa);
- ca. Kapawiwahan kaceburin, kautsahayang antuk jadma sane magama Hindu utawi jadma sane maagama siosan sane sampun nglaksanayang pamarisuda raga utawi sudi wadani;
- ra. Sane kamanggehang santana rajeg patut masadok ring prajuru banjar tur kelian banjar nyiarang ring banjar saha ngaturang ring prajuru desa pakraman.

Pawos 56

- (1) Ngangkat santana manut dudonan patut maka cihna artha brana pamerasan sane kasaksiang sekala niskala;

- (2) Sapa sira ugi krama pacang ngangkat santana patut masadok ring prajuru adat sanistane asasih sadurung pamerasan;
- (3) Prajuru Adat/Bandesas Adat kawakilin antuk kelian banjar adat nyobyahang ring sawidangan desa/banjar, manawi sang sapa sira ugi rumasa tan lila, mangda masengker kalih wuku sadurung pamerasan masadok ring Prajuru Adat/Bandesas Adat;
- (4) Prajuru Adat/Bandesas Adat digelis mawosin saha ngicenin pamutus nepek ring catur dresta miwah pararem;
- (5) Prade sulur pamerasan tan manut kecaping ajeng, prajuru adat/bandesas adat wenang ngandeg sang pacang ngamargiang pamerasan, saha ngicenin pamutus mangda kapuputang rihin babawosan manut sulur utawi wicaran nyane;

Pawos 57

- (1) Paperasan sane kapatut ring desa ri sampun maka cihna :
 - ha. Widhi widhana pamerasan;
 - na. Kasaksinin antuk prajuru desa sane makelingang utawi ngilikitayang;
 - ca. Kasobyahang ring wawidangan desane;
- (2) Sane kapatut peras anggen santana kadi ring sor :
 - ha. Jadma agama Hindu;

- na. Kulawarga saking purusa, prade tan wenten kengin saking wadon, yaning taler tan wenten wawu kengin sakama-kama (saking kayun);
 - ca. Kautamayang saking waris pancer kapurusan;
 - ra. Sinalih tunggil mawiwit saking kulawarga tunggal sanggah utawi mrajan, paibon lan dadia, utawi ngambil anak tios sakewanten sang magama Hindu;
 - ka. Pepernahan utawi kepatutang saking sang meras;
- (3) Kengin ngangkat santana langkung ring adiri, lanang wiadin wadon;

Palet 9

Indik Nyapian

Pawos 58

- (1) Pawiwahan prasida kawusang malarapan antuk palas marabian utawi kalayu sekaran;
- (2) Wusan mapikuren riantukan silih sinunggil lina mapiteges balu, makadi balu lanang/istri;
- (3) Palas marabian inggih punika sangkaning lascarya miwah sangkaning mawiwit wicara kabawos nyapian;
- (4) Sang ayat palas marabian patut atur supekta indik pailikitan nyane rihin ring sang rumawos (Pengadilan Negeri) wastu tinas apadang pamutus nyane kabawos nyapian, wawu prajuru adat nyiarang kawentenannya ring desa utawi banjar;

- (5) Jadma sane pecak palas makurenan prade atep malih tan patut kadanda punapa-punapi kewanten mangda aparisuda sadu ring kelian desa tur mangda ngewentenang upakara-upakara pawiwahan malih;
- (6) Jadma palas makurenan saking ngelidin ayahan banjar utawi desa, patut kadanda gung arta 250 (satak seket) jinah bolong asli reh janten corah ring banjar muah desa;

Pawos 59

- (1) Tata cara palas marabian sakadi ring sor :
- ha. Pagunakayan polih pahan pada;
 - na. Pabekel tatadan soang-soang kakuasa niri-niri lan warisan kakuasa antuk purusa;
 - ca. Ngaweruhin miwah ngupajiwan pratisantana manut swadarmaning guru rupaka;
- (2) Prade riwekas sang palas kacihna adung malih, patut ngamargiang pawiwahan malih;

Pawos 60

- (1) Sang balu kabinayang dados :
- ha. Balu luh wit santana (santana rajeg) miwah balu luh boya sentana;

na. Balu muani kapurusa (wit sentana) kapurusa miwah balu muani nyeburin (boya sentana nyeburin).

(2) Swadarmaning balu inucap patut :

ha. Ngamanggehang patibrata tan kengin ngamargiang paradara/ drati krama;

na. Nguwasayang waris gunakaya, tan dados ngadol, ngadeang, makidihang lan siosan punika, sajawaning kabebasan sakeng pianak utawi kulawarga pinih tampek saking prabina prade okane kanton alit-alit.

ca. Kengin ngidih sentana prade wenten pidabdab sadurung sinalih tunggil ling, saha kabebasan antuk kulawarga sinanggeh kapurusa;

ra. Kawenangang mawiwaha malih yan wenten kabebasan manut aksara ring ajeng.

(3) Balu kaucap tan pageh sakadi ring sor :

ha. Drati krama utawi paradara;

na. Matilar saking pakubon tan pasadok jantos 6 (enam) sasih;

ca. Lempas ring swadarma sios-siosan tan prasida ngesehin solah maprawerti arep ring pituduh kulawarga purusa.

Palet 10

Indik Warisan

Pawos 61

- (1) Warisan inggih punika artha brana saha ayah-ayahan ngupadi sukerta sekala niskala saking keluhuranya arep ring turunannya.
- (2) Karang sinanggeh warisan luire :
 - ha. Duwe tengah, makadi tegal, sawah, pekarangan peumahan, ayahan desa, kahyangan, pasuka siwa karang, lan sane siosan;
 - na. Pagunakayan, tatadan/jiwa dana, hutang piutang.
 - ca. Pemerajan Kemulan;
- (3) Wawu kengin kabaos warisan prade wenten :
 - ha. Sang mapiturun (pawaris)
 - na. Katurunan (ahli waris);
 - ca. Artha brana tategenan (ayah-ayahan) maka cihna warisan.

Pawos 62

- (1) Ahli waris, luire :
 - ha. Pratisentana purusa.
 - na. Pratisentana (sentana rajeg);
 - ca. Sentana paperasan lanang/wadon;

(2) Prade tan wenten sakadi ring ajeng kang sinanggeh ahli waris :

ha. Turunan purusa, pernah ngunggahang makadi rerama, lanang, pekak, selanturnia, rerame misan, mindon;

na. Turunan purusa, pernah ke samping makadi kaponakan dimisan miwah mindon.

(3) Swadarmaning ahli waris patut :

ha. Nerima, saha ngutsahayang tetamian pahan kaluhurannya, makadi ngrempon sanggah/mrajan, pura, saha pangupakarania miwah ayah-ayahan pawaris;

na. Ngabenang pawaris saha nglanturang upacara-upacara Pitra;

ca. Naurin hutang-hutang pawaris manut panglokika.

Pawos 63

Mungguwing waris kawaris ring Desa Adat/Pakraman kamargiang makadi ring sor :

(1) Risampun kalaksanayang Pitra Yadnya lan hutang-hutang pawaris buntas katawur, wawu warisan dados kaepah.

(2) Para ahli waris sami polih pahan sangkaning pagunakayan, sajawaning karang/tegal ayahan desa kaemong antuk ahli waris kang sinanggeh krama ngarep.

(3) Sinalih tunggil ahli waris kengin tan polih pahan prade :

ha. Nilar kawitan lan sesananing agama;

na. Alpaka guru rupaka;

ca. Santana rajeg kesah mawiwaha utawi pratisentana nyeburin soang-soang kabawos ninggal kadaton.

(4) Boya ahli waris, kengin muponin hasil manut dudonan, luire :

ha. Santana luh, selami durung kesah mawiwaha utawi alpaka guru miwah prade medrebe pianak tan keangkenin antuk wong tuan rare inucap kengin ngewaris wantah pikolih (pegunakaya) sentana luh inucap kemawon;

na. Balu luh wiadin muani nyeburin (soang-soang boya sentana);

ca. Mulih daha utawi mulih teruna, riantukan ring pewiwahan pecak sampun kebawos ninggal kadaton;

(5) Pawaris kengin maweweh ri kala maurip pinaka jiwa dana, tatadan/ bekel, maka cihna paweweh tetep ring okane sane kesah mawiwaha.

Pawos 64

(1) Prade sajeroning pakulawargan wenten ahli waris langkungan ring adiri patut:

ha. Kawentenang paigum indik pedum waris inucap;

na. Yan tan prasida katunasang tatimbang ring prajuru desa;

ca. Prade taler tan wenten cumpu ring panepas prajuru desa, kengin katunasang ring sang rumawos (Pengadilan Negeri).

(2) Prade karang inucap kaputungan, patut prajuru/dulu desa nibakang ring :

ha. Sang sinanggeh ahli waris manut pawos 62;

na. Sang kengin anggen sentana manut pawos 57;

ca. Prade taler tan wenten cumpu ring panepas Prajuru Desa, kengin kautsahayang ring sang rumawos (Pengadilan Negeri);

(3) Prade jantos karang desa kepah utawi kasepih, patut soang-soang nedunin makrama desa ngarep;

SARGAH LIMA

SUKERTA TATA PALEMAHAN

Palet 1

Indik Karang, Tegal lan Carik

Pawos 65

(1) Krama Desa pangemong karang paumahan, panegalan patut ngawentenang wates sane marupa tembok utawi pagehan;

(2) Karang wiadin panegalan patut magaleng kadulu utawi kaluanan, teges ipun magaleng kaler wiadin kangin sane ngardi wates sane magenah ring tebenan (badelodan utawi badawuhan);

- (3) Yaning wenten karang desa kepah dados kalih utawi langkungan soang-soang kulawarga sane nanggap tur sane ngawentenang pamedalan patut nedunin makrama desa tur keni ayah ngarep;
- (4) Wates kawenangan/kadadosang ngangge tembok, pagehan miwah pal;
- (5) Yan wenten karang kabebeng, patut sang meduwe karang ngutsahayang wenten margi;
- (6) Prade wenten karang kaputungan wenang prajuru nibakang ring Krama Desa;
- (7) Yan wenten karang kaputungan wenang Prajuru Desa nibakang karang punika pertama ring turunan purusa pernah ngunggahang, ping kalih ring purusa pernah kasamping, ping tiga ring krama tiosan sane magama Hindu;
- (8) Karang Desa, Karang Paumahan, Panegalan kaupapira sakala niskala manut Sastra Agama Hindu;

Pawos 66

- (1) Tan wenang ngalah-alah karang, tegal, margi, genah sane sinangguh suci makadi kahyangan, setra lan sapanunggilan ipun;
- (2) Tan wenang ngembahang toya, wit toyan hujan, toya wawalungan (limbah ternak), toya puwaregan (limbah dapur) lan sapanunggilan ipun kapakarangan tios;
- (3) Tan dados ngentungan/ngutang luwu, wangken wawalungan, tawulaning jadma kapakarangan, tegal, carik anak tios;
- (4) Tan wenang nunjel, nanem sawa yadiastun sawa karesian ring karang tegal/ panegalan wiadin sawah;

- (5) Yan murug kadi kecap ring ajeng patut ngawaliang wit wicarane tur kawewehan pamrayascita manut dresta lan sastra Agama sane kacumawisang ring pararem soang-soang banjar;

Palet 2

Indik Setra

Pawos 67

- (1) Setra wawidangan desa adat pastika wates nyane;
- (2) Setra desa adat inggih punika setra krama desa adat sane magama Hindu.
- (3) Indik migunayang setra patut masadok ring prajuru;
- (4) Nenten kapatutang makarya undung-undung utawi rumah kubur ring setra desa adat ;
- (5) Muah sane tiosan sane mapakilitan ring setra lan pangupapiran nyane;

Pawos 68

- (1) Sinalih tunggil krama desa/banjar tan kalugra :
 - ha. Ngalah-alah margi, karang ayahan desa; karang desa;
 - na. Ngalah-alah tanah tegak kahyangan, lan setra, sakancan tegak sinanggeh suci.

- ca. Prade wenten sakadi ring ajeng, sang ngalah-alah patut ngwaliang tanah inucap saha pamidanda sapatutnya kadulurin upakara ring genah suci sane kalah-alah;
- (2) Karang desa telajakan pura tan dados dagingin wewangunan tiosan ring wewangunan serana kahyangan;
- (3) Krama desa sane polih nanggap karang :
- ha. Tan dados ngadol, ngadeang, nyingkuhang, makidihang karang desa punika;
- na. Pradennyane megingsir saking desa adat Kekeran, mangda ngewaliang malih karang inucap ke desa;
- ca. Sane dados umanjing utawi ngarap karang inucap ring pasemetonan wantah sodet kapurusa, misan mindon, tur sane megenah sajeroning banjar punika;
- ra. Yening sajeroning banjarnya tan wenten misan mindon sekadi munggah ring ajeng wenang jadma tiosan nanggap nanging sajeroning banjar punika, manut tetimbangan prajuru banjar sareng krama banjarnya;
- ka. Yening tan wenten ring sajeroning banjarnya kaserahang ke desa;
- (4) Yen wenten tanem tuwuh sajeroning karang punika luwir ipun : kelapa, jaka, nangka, muah sane mautama punika, patut kakingsanan selamin ipun atahun. Yening keni sukat bangunan, ngelikadin, taru punika tan dados kekingsanan;
- (5) Tanah desa telajakan pura, patut kapiara olih krama desa;

- (6) Tan wenang makta, ngenahang barang sane ngeletehin ring karang paumahan, napi malih yen ngelimbak ngelantur sinanggeh ngeletehin desa;
- (7) Asing warga desa utawi banjar ngewangun penyerapan kakus, patut mewates paling nampek dasa meter saking sumur tunggil penyapian;
- (8) Asing-asing warga desa utawi tamyu mondok ring sawah, penegalan tan wenang alaki rabi;

Palet 3

Indik Pepayonan

Pawos 69

- (1) Ngawit nandur pepayonan, tanem tuwuh patut adepa agung ngajeroang saking wates, prade jantos ngliwat wates wenang kasepat gantungan;
- (2) Yening wenten pepayonan ngungkulin, samaliha mawastu mayanin ka pisaga patut kawara antuk paiguman ping ajeng prasida sang nruwenang wit ngrebah utawi notor;
- (3) Prade sampun kawara taler tan wenten usaha sang nruwenang wit, sang rumasa katetehan/kajerihan wenang masadok ring prajuru, tur ri sampun kaparitas kalugra ngicalang wit inucap, sakewanten patin pepayonan patut keatur manut pengeletika sane nepasin sekadi ring sor :

ha. Sane nruwenang 1/3 (pah telon)

na. Sane melaksana notor 2/3 (kalih pah tiga)

- (4) Sang keni pamidanda panyangaskara saha prabea pengentos sepatut arep ring wewangunan sang karubuhan luire :

ha. Sang nruwenang wit sinanggeh mayanin, prade pungkut ngrubuhin wawangunan krama sios;

na. Sang notor, munggul utawi ngrebah taru tur ngrubuhin wawangunan krama sios;

- (5) Krama desa patut ngamanggehang kawerdian tanem tuwuh sane ngawinan desane asri tur lestari;

Palet 4

Indik Wawalungan

Pawos 70

- (1) Sahanan warga desa sane mamiara wawalungan makadi bawi, banteng, kambing, kebo, jaran, bebek, angsa, kuwir miwah sane tiosan ri sampun mabelas utawi sampun masaluk tali, patut sayaga nitenin negul/ nglogor mangda tan ngarusakin karang utawi pabyanan krama sios. Bilih-bilih jantos ngranjing ngaletihin kahyangan suci;
- (2) Prade wenten wawalungan malumbar utawi ngeleb ngarusakin karang, pabyanan krama sios, ri sampun kawara kengin kataban tur kadanda ngawaliang wit sane karusak saha nawur panebas papiaran tatabanan **manut panglokikan prajuru desa;**

- (3) Prade jantos ngaletihin genah suci minakadi pamrajan (Sanggah Kamulan), parhyangan ri sampun kaparitas antuk prajuru wenang sang nruwenang kadanda mabuwu agung, tebasan-tebasan, prayascita durmenggala utawi panca sata iwak bebek blangkalung pradene nganti ngaletihin Kahyangan Desa utawi Pura Pamaksan;
- (4) Krama desa patut nyarayanin wawalungan miwah sarwa prani, tan kapatutang maboros paksi miwah nuba utawi nyetrum ulam lan siosan punika. Prade memurug keni danda **manut pararem** kemargiang antuk pecalang desa;
- (5) Mungguwing panabanan wewalungan patut :
- ha. Sang naban digelis masadok ring prajuru banjar utawi desa;
 - na. Wewalungan sane tan wenten ngangkenin jantos tigang rahina patut kaserahang ring sane naban;
 - ca. Yan padem tan pakardin sane naban tan dados ngarsayang prebiya pamiara, sang madruwe tan dados ngarsayang pengentos pengangan wewalungan sane padem;
- (6) Yening wewalungan sane ngerusak pabiyanan kapademang olih sang sane nruwenang peabiyanan, patut sane mademang wewalungan ngentosin sepengangan maurip;

Palet 5

Indik Wawangunan

Pawos 71

- (1) Nyabran ngawangun patut :